

Su chi AsSèminas arregollis

16 de Mes'e Ladàmini 2020



Is scàtulas Tetra Pak (cument'e cartonis de lati, sucis de fruta, binu e àterus alimentus) funt riciclàbilis e depint èssiri arregortas impari a su paperi e a su cartonì in su strexu apòsitu, a manera de ddas pòdiri arreguberari in cartiera. E prus chi no àteru, no andant mai fuliadas a travessu!

Custu est su messàgiu de sa campànnia informativa “Ciò che AsSemini raccogli”, iniziativa apariciada de su Comunu de Assèmini in collaboratzioni cun Tetra Pak Italia po favoressi is arregortas diferentziadas.

Sa campànnia, realizzata de sa Cooperativa E.R.I.C.A., bolit pònniri in evidèntzia sa filiera de su riciclu de paperi e cartonì e donari calincunu inditu, meda simpri, po fàiri beni s'arregorta a manera giusta de is scàtulas Tetra Pak: bastat a sbuidari beni sa scàtula po ndi bogari is urrestus de cosa de papari o de bufari, aparixendudedda e, chi fait, es mellus a ndi bogari is partis de pràstica (tapus, cannùcias, etc.). E a pustis bastat a dd'arregòlliri impari a su paperi e a su cartonì. In s'interis, s'iniziativa tenit fintzas su scopu de arregordari a totus is arrègulas po pratziri totu is materialis ogetu de arregorta diferentziada, crarendi dudas e agiudendi a melliorari sa calidadi de is materialis de mandari a riciclu.

In prus de apicari manifestus de sa campànnia in is puntus de prus visibilitadi in su territòriu comunali, in s'interis de sa campànnia at a èssiri spratzinau unu follu informativu cun is informatzionis po fàiri beni s'arregorta diferentziada, cun unu *focus* spetzìficu asuba de is scàtulas Tetra Pak, chi at cuntènniri informatzionis útilis asuba de su littering, est a narri su scàbudu de is arrefudus piticus, fenòmenu chi po sfortuna s'acostumat a fàiri meda e fait dannus a sa natura, e de

is sanzionis po chini est responsàbili. “Sensibilizari sa comunidadi contras a su scàbudu de is arrefudus – torrat a narri Sabrina Licheri, Sìndigu de Assèmini – est un’apretu de s’Amministratzioni nosta: sa collaboratzioni cun Tetra Pak Itàlia dd’acrarat e dd’at a arreforzari in modu profetosu sa campànnia informativa nosta. Sa comunicatzioni giusta at a produsi is arrisurtaus disigiaus.” Sa campànnia prevediat fintzas puntus informativus in su territòriu po sensibilizari is tzitadinus: po mori de is limitatzionis de s’emergèntzia Covid, e po limitari totu su chi si podit is cuntatus intre is personas s’est detzìdiu, in parti insoru, de amostai unu videu de su arrefudòlogu e divulgadori ambientali Roberto Cavallo, imperendi is canalis social de su Comunu e in s’interis ant a èssiri amostadas is maneras prus giustas de cunferiri is cunfetzionis Tetra Pak e una spètzia de “arrepassu” de is arrègulas po fàiri un’arregorta diferentiada in sa mellus manera.

«Sa campànnia a incuru de is assessoraus a sa Cultura e a s’Igieni urbana in collaboratzioni cun Tetra Pak, chi ddis torraus gràtzias po s’agiudu, s’at a permitìri de amellorari sa calidadi de s’arregorta diferentiada nosta e de fàiri sempri prus bella sa tzitadi nosta - marcat Alessia Meloni, Assessora a s’Igieni Urbana de su Comunu de Assèmini-. Custu obietivu at a pòdiri èssiri aguantau cun sa collaboratzioni ativa e s’impinnu fitianu de parti de totu is tzitadinus».

Aciungit Rachele Garau, Assessora a sa Cultura de su Comunu de Assèmini - “Custas initziativas funt de importu po sensibilizari sa comunidadi de sa gravidadi, de is dannus a s’ambienti de is scàbudus chentza perunu sceberu de is arrefudus chi no funt biodegradàbilis. Seu segura ca is tzitadinus ant a arrespundiri a s’apellu e sceti impari podeus cumentzari una cultura de arrespetu de s’ambienti fata de valoris fungudus cument’e: prevènniri e arredusi is fenòmenus de scàbudu de is arrefudus e arrespetu po s’ambienti innui biveus.”

Po àteras informatzionis de s’arregorta diferentiada e de su riciclu de is scàtulas Tetra Pak si podit consultari su situ www.tiriciclo.it